

豫章

叢書

第五冊

芭山文集卷十六

宜春 張自烈著

傳一

晉陶潛傳

淵明不忘晉宜列忠義晉書安附隱逸與公孫和
夏仲御諸人並稱綱目書晉徵士卒闕彭澤令不
書皆失實因刪取梁蕭統所撰傳爲更定如左

陶潛字淵明一字元亮潯陽柴桑人曾祖侃晉大司
馬祖茂武昌太守潛少懷高尚善屬文嘗著五柳先
生傳傳曰先生不知何許人不詳姓字宅旁有五柳

因以爲號聞靜少言好讀書不求甚解每會意欣然
忘食性嗜酒家貧不能恒得親舊或置酒招之造飲
輒盡旣醉而退不吝情去留環堵蕭然風日不蔽短
褐穿結簞瓢屢空晏如也文章自娛頗示已志忘懷
得失以此自終時人謂之實錄初親老家貧起爲州
祭酒不堪吏職少日自解歸州召主簿不就躬耕自
資遂抱羸疾後爲鎮軍建威參軍謂親朋曰聊欲絃
歌爲三徑之資可乎執事者聞之以爲彭澤令不以
家自隨送一力給其子曰此亦人子也可善遇之公
曰悉令吏種秫曰吾常得醉於酒足矣妻子固請種

杭乃使二頃五十畝種秫五十畝種粳在官八十餘
日會郡遣督郵至縣吏白應束帶見之潛嘆曰我豈
能爲五斗米折腰向鄉里小兒卽日賦歸去來辭解
綬去徵著作郎不就旣絕州郡覲謁所之惟田舍及
廬山遊觀而已刺史王宏以元熙中臨江州自造潛
潛稱疾不見宏欲識潛不能致潛嘗往廬山宏命其
故人龐通之齎酒具先於半道栗里間要之潛過酒
引酌野亭俄宏至與歡飲窮日潛無履宏顧左右爲
造履左右請履度潛于坐申脚令度焉宏問所乘答
云素有脚疾向乘籃輿亦足自反乃令一門生二兒

昇之至州宏後欲見輒林澤間候之潛酒米乏絕宏
時相瞻親朋載酒肴往潛亦無所辭先是顏延之爲
劉抑後軍功曹在潯陽與潛情款後爲始安郡經過
潯陽日造潛飲宏欲邀延之坐彌日不得延之臨去
留錢三萬與潛潛悉遣送酒家稍就取酒當九月九
日出宅邊菊叢中坐久之滿手把菊適宏送酒至卽
就酌醉而歸夏月高臥北窗下清風颭至自謂羲皇
上人性不解音律蓄素琴一絃徽不具酒適則撫弄
寄其意貴賤造之者有酒輒設潛醉便語客我醉欲
眠卿可去其眞率如此郡將嘗候潛值釀熟取頭上

葛巾漉酒漉畢還著之時周續之入廬山事釋慧遠
彭城劉遺民遜匡山潛不應徵命稱潯陽三隱後刺
史檀韶請續之出州與學士祖企謝景夷共在城北
講禮加以警校所住公廨近馬隊故潛作示三郎詩
諷之潛自以曾祖晉世宰輔恥屈身後代自永初以
後不復肯仕元嘉四年將復徵命會卒年六十三世
號靖節先生有詩文八卷行于世

宋書列潛隱逸爲朱言也晉書不入忠義則非知
潛者余初持此議芑山急遽之因改陶潛傳刪歸
去來辭而補恥屈後代一段甚合史法但道濟餽

肉在宋元嘉三年芑山初本據南史置令彭澤前
未免失考余復馳書正之芑山爲更定若此旣嘆
著述之難益見芑山虛受之美也

弟勲識

隋王通傳

明史官申時行以唐貞觀修隋書闕通姓氏宋鄭
樵通志止於隋闕傳因述通傳然余觀申氏傳紀
載弗詳文辭尤陋背史氏傳信大義復采世系年
表及文中子世家引質同異刪釐複重爲次其言
行合道者補後先國史所未備無卒使其失傳焉
王通字仲淹其先漢徵君霸大原廣武人十八代祖

殷雲中太守家於祁以春秋周易訓鄉里十四代祖述公府辟不就九代祖寓遺晉懷愍國難遂東遷寓生罕罕生秀率以文學稱秀生二子長玄謨次元則元則通六代祖也仕宋歷大僕國子博士元則生江州府君煥煥生虬虬如北事魏太和中爲并州刺史家河汾虬生同州刺史彥彥生濟州刺史傑傑生銅川府君隆開皇初以國子博士待詔雲龍門帝賜對言曰陛下雖負堯舜之資終以不學爲累承詔著興衰要論七篇言六代得失至悉每奏帝稱善出爲樂昌令遷荷氏銅川秩滿退歸遂不仕開皇四年隆夫

人生通九年江東平隆嘆曰王道無叙天下何爲而
一通是時侍側方十歲有憂色曰通聞古之爲邦有
長策故夏殷以下數百年四海常一統後之爲邦行
苟且之政故魏晉以下數百年九州無定主上失其
道民散久矣夫子殆憂皇綱不振生人勞於聚斂而
天下將亂乎隆異之告以元經之事通再拜受之十
八年隆晏居歌伐木召通曰自天子至庶人未有不
資友以成者也小子勉旃通於是有四方之志始受
書於東海李育學詩於會稽夏瑱問禮於河東關朗
正樂於北平霍汲考易於族父仲華不解衣者六年

其精苦蓋如此仁壽三年通甫冠西遊長安謁文帝
帝召見太極殿通奏太平策十有二遵王道推霸略
以正始爲先帝下其議於公卿公卿皆不悅通知謀
不見用作東征歌而歸帝聞再徵通不至四年帝崩
大業元年徵又不至謂所親曰我周人也河汾故墳
壟於茲四代道旣不行退志其道而已司徒楊素勸
通仕答曰讀書談道足以自樂願君侯正身以治天
下使時和歲豐通受賜多矣不願仕也或譖通於素
曰通慢公素以問通通曰使公可慢則僕得矣不可
慢則僕失矣得失在僕公何預焉素待通如初由是

纂述六經九年而就其言曰吾續書以存漢晉之實
續詩以辨六代之俗修元經以斷南北之疑贊易道
以申先師之旨正禮樂以旌後王之失門人自遠至
者日衆通後先與弟子問對其略曰罪莫大於好進
禍莫大於多言又曰學者博誦云乎哉必也貫乎道
文者苟作云乎哉必也濟乎義又曰史傳興而經道
廢矣記注興而史道誣矣是故惡夫異端者又曰不
就利不違害不强交不苟絕惟有道者能之又曰無
赦之國其刑必平重斂之國其財必削賈瓊問羣居
之道曰同不害正異不傷物房元齡問事君之道曰

無私問使人之道曰無偏問化人之道曰正其心問
禮樂曰王道盛則禮樂從而興非爾所及也李密問
王霸之略曰不以天下易一民之命密出通謂賈瓊
曰亂天下者必是夫也幸災而忘禍愛強而顧勝神
明不與也九年楊元感使使召通通不往謂使者曰
爲我謝楚公天下崩亂非至誠不能安苟非其道無
爲禍先十年尙書召署蜀郡司戶不就通閒居儼然
其動也徐其行也方其接長者恭然如不足接幼者
溫然如有就性樸儉宴賓無二饌食必去生味必適
鄉人窮乏者曰爾於我乎取無提爾鄰里鄉黨爲也

我則不厭鄉人有喪必先往反必後或問人善通知
其善則稱之不善則曰未嘗與交也講學之暇負耒
躬耕或勞之通曰庶人職也吾得逃乎魏永爲龍門
令下車欲廣其舍通曰非所先也勞人逸已胡寧是
管永遽止謝通通曰不勤不儉無以爲人上也銅川
府君之喪勺飲不入口者三日營葬具曰必儉也吾
家有制焉十一年以著作郎國子博士徵並不至十
二年江都難作通寢疾嘆曰生民厭亂極矣天將啟
堯舜之道吾不與焉命也越七日卒年三十有三門
弟子數百人議曰仲尼旣歿文不在茲乎易曰黃裳

元吉文在中也請諡曰文中子設位哀以送之禮畢
悉取文中子書還王氏禮論二十五篇十卷樂論二
十八篇十卷續書一百五十篇二十五卷續詩三百
六十篇十卷元經五十篇十五卷贊易七十篇十卷
皆軼不傳獨中說列天地事君周公問易禮樂述史
魏相立命關朗凡八篇宋阮逸序今行世二子長曰
福郊少曰福時

史臣曰文中子言行有足述者中說擬論語類剽掇
先聖遺文蓋醇疵半焉甚矣後儒之不知去取也通
自言竊比仲舒而其徒齒諸孔子杜淹復倣史遷尊

仲尼例作世家豈定論哉世傳通母夫人履巨室有
娠及卒通夢顏回稱孔子召己誕妄無足信故略雖
然文中子碩儒也與亂終始未竟厥志悲夫

宋蘇洵傳

宋史文苑傳述洵行業不詳附載心術遠慮二篇
余按心術剽掇兵家言遠慮頗乖經傳刪弗錄獨
存辨姦論以見洵書足傳者不在彼而在此也上
仁宗書瑜瑕並見故不列本傳

蘇洵字明允眉州眉山年二十七始發憤就學歲
餘舉進士舉茂才異等皆不中退而嘆曰此不足爲

學悉取所爲文數百篇焚之益閉戶讀書通六經百
家下筆俄頃數千言居恒善與人交性不妄喜可方
王安石名始盛黨友傾一時人樂與遊洵獨遠去不
顧安石母死士大夫皆弔洵不往作辯姦論一篇論
曰事有必至理有固然惟天下之靜者乃能見微而
知著月暈而風礎潤而雨人人知之人事之推移理
勢之相因其疎闕而難知變化而不可測者孰與天
地陰陽之事而賢者有不知其故何也好惡亂其中
利害奪其外也昔者山濤見王衍曰誤天下蒼生者
必此人也郭子儀見盧杞曰此人得志吾子孫無遺

類矣自今而言其隱誠有可見者以吾觀之王衍容貌言語固有以欺世而盜名者然不忤不求與物浮沈使晉無惠帝僅得中主雖衍百千何從而亂天下乎盧杞之姦雖足以敗國然而不學無文容貌不足以動人言語不足以炫世非德宗之鄙暗亦何從而用之由是言之二公之料二子亦容有未必然也今有人口誦孔老之言身履夷齊之行收召好名不得志之人相與造作言語私立名字以爲顏淵孟軻復出而陰賊險狠與人異趣是王衍盧杞合而爲一人也其禍豈可勝言哉夫面垢不忘洗衣垢不忘澣此